

## **Assalomu alaykum, aziz va dilbar ayollarimiz, lohar opa-singillarimiz!**

Avvalo, sizlarni, sizlarning timsolingizda mamlakatimizdagi barcha onaxonlar, opa-singillar, lohar qizlarimizni ezgulik va go'zallik bayrami 8-mart – Xalqaro xotin-qizlar kuni bilan shaxsan o'zim qolaversa, vazirligimiz jamoasi nomidan chin qalbdan muborakbod etaman.

Oila va jamiyat ustuni, hayotimizning fayzi va ko'rki bo'lgan xotin-qizlarni e'zozlash, ularga hurmat va ehtirom ko'rsatish xalqimiz uchun azal-azaldan buyuk qadriyat bo'lib kelgan va shunday bo'lib qoladi. Chunki sizlar bilan hayotimiz go'zal va mazmunli, xonadonlarimiz obod va nurafshondir.

Vatanimiz taraqqiyotida, oila va jamiyat hayotida xotin-qizlar muhim o'rin va mavqega ega. Ayollarimiz mamlakatimizning ijtimoiy-siyosiy, iqtisodiy hayotidagi barcha sohalarda samarali mehnat qilib kelishmoqda.

Xususan, mamlakatimiz transport sohasida ham siz kabi yuzlab oqila ayollarimiz bugun biz bilan baravar mehnat qilishmoqda. Soha rivoji, yurt ravnaqiga o'zining munosib hissasini qo'shishmoqda.

Yurtimizda xotin-qizlarni har tomonlama qo'llab-quvvatlash, onalik va bolalikni muhofaza qilish, oila mustahkamligini ta'minlash davlat siyosati darajasida ekanligi bilan bugun har qancha faxrlansak arziydi.

Zero, aynan ayolga hurmat va ehtirom ko'rsatish, jamiyatda ularning munosib o'rin egallashi uchun barcha shart-sharoitlarni yaratish, bu orqali esa oilalar farovonligiga erishish muhtaram Prezidentimiz tomonidan yuritilayotgan ijtimoiy adolatga asoslangan siyosatning asosiy yo'nalishidir.

Transport tizimi shubhasiz mamlakatimiz iqtisodiyotining asosiy tarmoqlaridan biridir. Ushbu g'oyat mashaqqatli sinovlarga to'la sohada o'z kasbingizdan baraka topib, ham ish, ham oilaga ulgurayotganingizning o'zi ulug' jasorat.

Biz bugun o'zining fidokorona mehnati, erishgan ulkan yutuqlari, davlat va jamoat ishlaridagi faol ishtiroki, ibratli fazilatlari bilan xalqimiz o'rtasida obro'-e'tibor qozongan yuzlab opa-singillarimizning nomlarini hurmat bilan tilga olamiz.

Xususan, 8-mart – Xalqaro xotin-qizlar kuni bayrami arafasida Prezidentimizning tegishli farmoni bilan «O'zaeronavigatsiya markazi» davlat unitar korxonasi Havodagi harakatni boshqarish avtomatlashtirilgan tizimi Toshkent markazi hududiy bo'linmasi dispetcheri Vasileva Tatyana

Aleksandrovna «**Do'stlik**» **ordeni** bilan Samarqand viloyati transport boshqarmasining tramvay liniyalarini ekspluatatsiya qilish direksiyasi tramvay haydovchisi Azimova Gulmira Djaxanovna, «Toshkent yo'lovchi vagonlarini qurish va ta'mirlash zavodi» aksiyadorlik jamiyatining ko'priqli kran mashinisti Sulaymonova Gulchexra Toxir qizi hamda Baliqchi tumani yo'l xo'jaligi pudrat ta'mirlash-foydalanish korxonasi ishchisi Mexmonova Ro'zixon Abduvalievna «**Shuhrat**» **medali** bilan taqdirlandi.

Qolaversa, Toshkent davlat transport universiteti Transport iqtisodiyoti kafedrasini mudiri Yuldasheva Saodat Arislanovna "**Mo'tabar ayol**" ko'krak nishoni bilan taqdirlandi.

Fursatdan foydalanib, ushbu mukofot sohibalarini transport sohasi vakillari, vazirligimiz jamoasi hamda o'z nomimdan chin qalbdan muborakbod etaman.

**Hurmatli opa-singillar!**

So'zimning oxirida barchangizni Xalqaro xotin-qizlar bayrami bilan yana bir bor chin qalbidan tabriklayman.

Barchangizga oilaviy xotirjamlik, xonadonlaringizga tinchlik, fayzu baraka tilayman. Doimo xalqimiz, Vatanimizning yuksak mehri va ardog'ida bo'lish hammangizga nasib etsin!

O'zbekiston Respublikasi Transport vaziri Mahkamov Ilhom Rustamovich

*2023-yil 7-mart*